

天文精義賦

天文精義賦卷之四

管句天文岳熙載撰

東方雜座

平道主除道塗轍

平道二星主除道路平道之官也武密云天子八達
之衢主誅道塗轍式路

天田乃躬耕之野

天田二星畿內之田亦爲藉田主疆場躬耕之田也
周鼎三星主流亡亦主壺鐻

酒器國之神器也秦無道周鼎淪於泗水其精上而爲之

攝提斗綱伺機祥而建時節

天官書曰攝提者直斗柄所指以建時故曰攝提主九卿一名三光

天門爲朝聘待客之所居也

天門二星朝聘待客之所居也

平星主執法平行以典獄

平星二星主執法平行以典獄是占曰大理卿位主

正綱紀平獄訟

庫樓爲天庫以藏兵

庫樓二十九星爲天庫藏兵之府

陽門主險隘而遠戍

陽門二星主執法器以邊武密云主遠戍邊境險隘之處也

南門天子之外門守兵禁備戒之處

南門二星天子之門主守兵禁

亢池主舟楫津渡

亢池六星主舟楫津渡之事

大角爲綱紀棟梁

大角一星爲天之紀綱棟梁天王座也一曰諫星

帝席宴樂酬獻

帝席三星宴樂酬獻之所

梗河矛鋒與喪

梗河三星一名天鋒又曰天盾主矛楯以備不虞亦

主胡兵又爲喪事

招搖矛楯番戎

招搖一星主矛楯及胡兵

玄戈夷狄胡兵

玄戈一星主夷狄胡馬兵革

折威以斷軍獄

折威七星主斬殺以斷軍獄

頡頏考察囚情

頡頏二星主考察囚情治獄官也

天乳飴醴之事

天乳一星主飴醴之事

陣車兵革之車

陣車三星爲兵革之車

騎官主宿衛而衛王者

騎官二十七星宿衛之騎士也主守衛王者

騎陣爲統攝而帥萬夫

騎陣將軍一星統車騎將也

車騎主部陳行列

車騎三星主部行列車騎之事一云總車騎之將

天輻主鸞駕乘輿

天輻二星主鸞輿車駕之事

賤人之牢星名貫索

貫索九星一曰連營一曰天牢賤人牢也

鍵閉主管籥以主開閉

鍵閉一星主管籥開閉之事

七公主刑罰以別善惡

七公七星主議政化執刑法以別善惡三公之象天之相也

西咸以防淫泆

西咸四星以占後宮以防淫泆房之戶也一云掌鉤
鈐主守帝心

日爲太陽之表

日一星所以昭明令德太陽之精也

積卒爲庶士而掃除不祥

積卒一十二星主掃除不祥五營軍是庶士之象也

從官主醫巫而疾病祝禱

從官二星主醫巫疾病祝禱之事

罰星金作贖刑

罰三星主罰金之事書所謂金作贖刑是也

東咸亦如西考

東咸四星所主如西咸

天紀理獄訟

天紀九星主理怨訟爲萬事之紀綱九卿之象

天江主太陰

天江四星主太陰

女牀御女侍從

女牀三星御女侍從也

傳說巫祝神靈

傳說一星巫祝之官也主祝神靈而求繼嗣

魚主雲雨風氣

魚一星主雲雨風氣一云狀雲主陰事故星讚云漢

中魚星如雲行

龜讚神明吉凶

龜五星主讚神定吉凶也

天鑰開閉關鑰

天鑰八星主開閉關鑰

農丈稼穡老農

農丈人一星爲老農主稼穡農正之官也

糠星以給參養

糠一星主簋糠粃以給參養

杵星以給庖春

杵三星主春以給庖廚

北方雜座

河鼓軍之鈇鉞拒難亦名三武

河鼓三星天鼓也主軍鼓也鈇鉞一曰三武中央大

星爲大將軍左星爲左將軍右星爲右將軍皆守險而拒難者也

二旗設險以知敵謀

左右旗各九星天之旗鼓爲旌表主音聲設險以知敵謀也

建爲謀事亦爲旗鼓

建星六星亦名天旗天之都關也爲謀事爲天鼓爲天馬南二星爲天庫中二星市也鉄鎖上二星爲旗其間光之道也

織女天女也瓜果絲帛

織女三星天女也主瓜果絲帛珍寶

漸臺晷漏也吹灰律呂

漸臺四星臨水之臺也主晷漏律呂吹灰之事一云
四高曰臺下有水曰漸

輦道嬉遊之路

輦道五星人主嬉遊之道也

天弁市官之主

天弁九星市官之長也

奚仲居正

奚仲四星主車正

天淵水府

天淵十星別名有三天泉天海太陰主灌溉畎畝溝

洫等事

天雞明伺候

天雞二星主伺候察時節

狗星主守禦

狗二星主守禦

狗國爲烏桓獫狁之屬

狗國四星主三韓鮮卑烏桓獫狁之屬

鯢星主水族魚蟲之物

鯢十四星主水族魚蟲

天桴主桴鼓刻漏

天桴四星主漏刻桴鼓之事

天津主四瀆津梁

天津九星一曰天漢二曰天江主四瀆津梁所以度神通四方也武密曰橫河中津梁之所渡

綱珠五星後宮府藏

綱珠五星主天子旒珠后妃環珮之飾

羅堰三曜渚蓄池塘

羅堰二星主農渚蓄灌溉之事亦爲拒馬一云主堤塘

九坎溝渠水旱

九坎九星主溝渠之事亦主水旱

天田隴畝農桑

天田九星畿內之地又主農桑

匏敗二瓜瓜果園圃

匏瓜五星主瓜果之果園亦主瓜果之事又主後宮陰謀敗瓜五星主瓜果之事

十二諸國列國之王

十二分星十二諸國周趙越齊秦魯鄭楚魏燕韓晉各主其地一云各分土地而居有列土之象

璃瑜鞋衣玉飾

璃瑜三星璃瑜衣瑜飾婦人之服也拜見尊服

哭星哭泣死喪

哭二星哭泣死喪

司祿分官祿年德

司祿二星主增益年德官祿食料之事

司危分臺榭安危

司危二星主驕佚以正下又主臺榭死喪之事

掌生筭者爲司命

司命二星主執刑罰又主生筭死喪之事

主過失者爲司非

司非二星主司過失

人星主萬民亦爲巡夜

人星五星一曰三卦星主萬民二者巡夜防淫泆如
人刑主安寧

車府爲客館亦其官爲

車府七星車輿之府亦其官也又爲客館

壘壁陣天軍營壘

壘壁十二星天軍營也是羽林之垣壘

天壘成鬼方北夷

天壘十三星主鬼方北夷也所以候存亡

敗曰亡敗災咎流移

敗曰四星主敗亡災咎

土公吏設備而主土

土公吏二星主備司過失主土之官也

杵與臼給軍而舂糧

杵三星曰四星主舂軍糧供廚也

造父御馬也亦有官矣

造父五星主御馬亦其官也

騰蛇水蟲也風雨北方

騰蛇二十二星天蛇也主北方水蟲風雨

治天子宮室者爲蓋屋

蓋屋二星主治物之官一云治天子所居宮室之官
主陵寢禱祝者爲虛梁

虛梁四星主陵廟禱祝之事

網爲弋網武帳

、天網一星主武帳弋網之事

泣主墳墓死喪

泣二星主墳墓倚瘞哭泣之事

天錢軍之府藏

天錢十星主財帛所聚軍之府藏也

師門藩落夷荒

北落師門一星主候兵天軍之藩落也

雷電霹靂雲雨各以其事所屬

雷電六星主興雷電

霹靂五星主陽氣太盛擊碎萬物

雲雨四星主四時雨澤

羽林翊衛之天軍

羽林軍四十五星主天軍翊衛之象

斧鉞行誅而用戮

斧鉞三星主刑誅拒難斬伐奸謀

王良車馬御車之官

王良五星馭車之官主駕車馬又爲天橋主津梁又主風雨急兵等事

天廄馬官驛遞之廄

天廄十星主馬廄之官若今之遞驛也

土公主營造而起土功

土公二星主營造及稼穡造起土之官

八魁設機穽而張禽獸

八魁九星主設機穽張羅致禽獸官也

西方雜座

附路乃閣道之便路

附路一星閣道之便路也

天濶乃養豢之穢所

天濶七星養豢之所也一云貯糞穢

外屏所以遮天濶而障臭穢

外屏七星主蔽障臭穢所以遮擁天溷也

天倉所以待邦用而藏五穀

天倉六星藏五穀以待邦用主倉廩之官也

土司乃功利之官

土司一星專主土水功利之官也一云主土功原

土之事

鈇鑕乃芟刈之具

鈇鑕五星乃芟刈之具所以斬芻而秣畜也一云主

斬芻飼牛馬

左更主仁智而爲山虞

左更五星主仁智陂澤林藪爲山虞之官

右更主禮義而爲師牧

註原闕

軍之南門禁出入以防奸

軍南門一星主禁出入以防盜詐軍營之南門也

天大將軍用軍兵而主武

天大將軍十一星主武用兵官也中大星爲將軍小

星爲吏士左右星爲旗

御廩之處爲天廩

天廩四星御廩也主蓄九穀養犧牲以待祭祀飲膳之用

積穀之所爲天庾

天庾三星積穀之所也

陰私潛謀今天陰

天陰五星主陰私潛謀之事從天子弋獵臣也一云主預密謀

陵墓死喪今天陵

大陵八星主陵墓死喪積京也

積屍陵中之墓

積屍一星陵中之墓也一名積京主死喪

天河密候山林

天河一星類天高主密候山林祆變

積水候水之災異

積水一星主候水災

天舡主舟楫津梁

天舡九星主舟楫水旱之事

芻藁主積芻藁

芻藁六星又名天積主積芻藁以供牛馬之用

天囷主給粢盛

天囷一十三星主給御廩之粢盛百庫之儲蓄

天苑兮牧養禽獸

天苑十六星養禽獸之所亦其官也

天園兮園囿蔬珍

天園十三星園囿也亦掌蔬茹之官

月星后臣之別

月一星太陰蟾蜍也女后大臣之象主刑及死喪

天街夷夏之分

天街二星主保道路天門之外街爲國界陰陽之所
分三光之正道街南爲華夏街北爲夷狄

礪石利百工之器

礪石四星主磨礪鋒刃利百工也亦主伺候明兵律

天譏主讒說之人

天譏一星主讒說佞人毀良善

言語樞機兮卷舌

卷舌六星主言語樞機之事讒之舌也一云主利口
持節奉使者天節

天節八星主持節奉使也

參旗天子之兵旗

參旗九星天子之兵旗所以尊居之進退

天臺觀雲之臺榭

天臺八星主望八方雲氣觀臺之象

諸王爲王室之藩屏

諸王六星主宗廟所以藩屏王室審察諸侯存王也

車柱乃天子之車舍

五車五星天子車舍五帝座也主五兵五稼以候豐耗其西北大星爲天庫神曰令尉主太白血秦雍主豆東北一星曰天嶽神曰風伯主辰星主燕趙主稻東一星曰天倉神曰雨師歲星主徐魯衛并主蕢麻東南一星曰司空神曰雷公主填星主楚荆主禾黍西南一星曰卿星神曰豐隆主熒惑主魏益主麥三柱九星一曰天泉一曰天休天旆在車舍之外

天潢津渡河梁

天潢五星又曰五潢天池也主河梁津渡之事

咸池陂澤魚鱉

咸池三星魚圉也主陂澤魚沼魚鱉鳧雁之事

殊口傳譯也遠方通俗

九州殊口九星主遠方俗傳譯之官也

九斿威旗也不虞乃滅

九斿九星一曰天旗天弓也司弓弩張弛之候以備
不虞

玉井主水泉而給廚用

玉井四星主水泉給廚用也

軍井給師旅以奉軍營

軍井四星軍營之井所以給師旅也晉志曰軍井遠將不言渴名爲此也

天屏障蔽天廁

天屏二星所以障擁天廁

矢廁積穢溷圉

天矢一星主糞穢

天廁四星主溷疾病之事

子孫主孝愛而侍老者

子一星主孝愛而侍者孫二星主與子同占曰子與孫侍丈人之側相扶而居

丈人主壽考而哀孤窮

丈人二星主壽考而哀孤窮也

明堂玉堂也布政垂裳

明堂三星布政之宮也

靈臺觀臺也仰觀祚祥

靈臺三星觀臺也以察祚祥占曰仰觀候變而爲人

備

土司空九土之界域亦人民風土之所宜

土司空四星又曰土司徒爲界域人民之事一云位九域地界風土所宜

器府主八音之樂技

器府三十二星樂器之府也

長沙主壽命以延期

長沙一星輔相之臣也主壽命星贊曰軫主死喪知吉凶設長沙以延期

青丘爲南方蠻夷之國

青丘星爲南方蠻夷之國也

進賢舉賢逸卿相之爲

進賢一星主卿相舉賢逸

天漢起末天漢之起起於尾箕經龜魚傳說歷天江糠
篇

天漢起東方尾箕之間謂之漢津始經龜魚傳說歷
天江天糠天篇斜行

連天并河鼓二旗之上倒一派映天市之吳越至宗人

宗星而止也

上連箕斗天弁河鼓左右旗上倒分一派西映天市之吳越至宗星而止

其大勢上絡天津而至大陵下厯卷舌而入東井

其大勢上絡天津車府造父騰蛇王良附命閣道天船大陵漸下而東南行又厯卷舌五車天潢司怪水府拂諸王入東井

過四瀆弧矢之墟在社稷七星而沒

過四瀆闕兵天狗弧矢天社天稷在七星南沒

天文精義賦卷之四

天文精義賦卷四

三

碧琳瑯館叢書

天文精義賦卷之五

管句天文岳熙載撰

天罇饘粥也以給貧飢

天罇三星罇器也主盛饘粥以給貧餒

五諸侯決疑斷獄

五諸侯五星一曰帝師二曰帝友三曰三公四曰博士五曰太史爲帝決獄斷疑戒不虞理陰陽察得失也

弧與矢備盜陰謀

三才圖會卷三
一
弧矢九星天弓也外一星矢也常執矢以向狼主行
陰謀備盜賊

軍市主天軍之貨易

軍市十三星天軍貨易之市也

野雞知變怪以虞伏

野雞一星知變怪在野外之郊以伏奸也

天狗守禦之良畜

天狗七星主守禦吠則地上狗皆應之

天狼侵掠之兇徒

天狼一星爲野將主盜賊侵掠

天社土地之主

天社六星土地之主社神也句龍之精上爲此星又主禱之官一云共工氏有子曰句龍平水土也死而精上爲天社

老人壽考之符

老人一星主壽考常以二分候之春分夕見於丁秋分晨見於丙

三分星列抵太微爲三公宣符開德

三台六星占上台中台下台雲而居起文昌列抵太
微一曰天柱三公之位主開德宣符也西近文昌二
星曰上台爲司命主壽次二星曰中台爲司理主宗
室東二星曰下台司祿主兵所以昭德塞過也三台
爲天階也又曰泰階太乙躡以上下上階上星爲天
子下星爲女主中階中星爲公侯下星爲卿大夫下
階上星爲市下星爲庶人所以和陰陽理萬物

主烹宰號爲外廚

外廚六星天子之外饗主烹宰以供宗廟

司農穀則爲天稷

天稷五星稷之神也又爲農正

天紀知禽獸之齒歲

天紀一星主知禽獸齒歲壽醫也

酒旗主饗宴之酒食

酒旗三星主享宴酒食之事亦爲酒官之旗幟也

天相宰相也朝服之製

天相三星大臣之相亦御府之官也主朝服之製

天廟祖廟也祭祀之儀

天廟十四星主祭祀天子祖廟也

軒轅爲權后妃雷電

軒轅十七星一曰東陵一曰權星主雷雨之神又爲黃帝之神黃龍之體后宮之象也后妃之宮庭主內政以弼太微其南大星女后也南小星女御也左一星少民后之宗右一星太民太后之宗次此一星夫人也屏也上將也又北也一星妃也次將也餘皆次妃之屬也軒轅爲權太微爲衡南宮朱雀權衡也長垣城邑也無界不防

長垣四星主邊界城邑也

少微師保也無微不諫

少微星四爲處士又爲士大夫亦女后之象及太史博士之官也一曰主衡掖南第一星曰處士次博士次議士次大夫占曰以賓賢才而弼南官之紀師保之官也故師以治王微保以見君

內平平罪之官

內平四星執法平罪之也

太尊貴戚之官

太尊一星貴戚也聖公之象

東甌爲南粵蠻夷之區

東甌五星南粵蠻夷之區也

軍門乃天子軍門之辨

軍門二星天子之軍門也

座旗爲旌表尊卑

座旗九星主旌表尊卑

天關主關防邊境

天關一星日月之所行謂之天門主開閉邊防道路

之事

司怪史臣話言災變

司怪四星主話災變而後祥異

水府水官提防波湧

水府水官四星也主提防溝洫之事南方雜座

四瀆江河淮濟

四瀆四星江河淮濟之精也

水位主水無疑

水位四星主水衡

積水供酒食之正

積水一星水官也所以供給酒之正

積薪給烹飪之爲

積薪一星主給外廚烹飪之事

南北二河所以分諸夏而定夷貊

南河南三星與北河爲兩界也南河南界也一曰陽門又曰越門南界自弘農函谷絕江漢南達嶺循漳西而東抵越鵠東甌以爲南紀爲陽國主禮樂之政兩界之間得山河分險之限是謂帝關七曜之常道

赤謂之天街。駕者隋郡名。北河三星爲北界。亦曰高門。又曰胡門。爲陰戶。北界自陽壺口絕上紀。而北負微垣。而東極獬豸。朝鮮以爲北紀。爲陰國主征伐之政。

闕上兩觀。所以布象魏而別尊卑。

闕上二星。東星曰東觀。西星曰西觀。是天子午門兩旁樓名曰象魏。

燿星烽火也。四時變火。

燿星四星。主四時變火。及烽燧司火之官也。

氣之遠近

候氣遠近眺望是先森在桑榆之上千有五百隱望林藪之內視之三千

氣之遠近以瞻望爲法者凡候氣初出時若雲非雲若霧非霧彷彿若可見森森然在桑榆之上高五六尺者是千五百里之外平望林藪間三千里

平視乃一千之數舉目則五百之觀

平視則一千里舉目則五百里

瞻望中天百里內矣登高矚地三千里焉

仰瞻中天百里之內登高而望下矚地者三千里
散漫一方則無咎須雜殺氣則可言

凡氣不積不結散漫一方不能爲災必須和雜殺氣
森森然疾起乃可論占

雲者山川之氣也古今之占候者以雲氣爲一類占焉
占期內有大風雨久陰則災不成故風以散之陰以
斂之雨以厭之

風之遠近動葉鳴條

從千里而來則動葉自百而格則鳴條

凡推風之遠近以勢力初遲後疾其來遠初急後緩其來近若動葉爲十里鳴條百里

搖林木葉核爲二三百里之限折小大枝榦乃四五百里之遼

搖枝二百里落葉核三百里折小枝四百里折大枝五百里

飛砂石有千里之遠拔大木及千五之遙

飛砂石一千里拔大木一千五百里乙巳占曰拔大樹連根出五千里

半日半夜爲五百里之風一日一夜是一千里之化

以時日占則半日半夜不止五百里一日一夜不止

一千里

三日三夜則風起三千七日七夜則風徧天下

三日三夜不止三千里七日七夜不止徧天下

若近山澤水濱風異常可話

天下有多風處若近川澤水濱異常卽占之有近風

穴發出時卽占

占例

星體搖者爲動搖生鋒芒者爲芒角

凡星動者光體搖動興作不安之象芒者光搖生鋒
芒刺角者頭角長大於芒皆主殺害之象內經曰芒
而大倍常之一其犯甚大常之二其生月卽至也注
曰甚謂政令大行生月災也芒大於常之二災生目
卽至金火有之又曰小常之一其化滅常之二事謂
臨視省下之過與其德也主曰省謂看察萬國人吏
侯王有德有過者也故使王侯人吏安可不深思戒

慎

喜則光色潤澤

和順度悅之象王冰曰光色黃明不盈不縮怡然然
然人見之壽星之喜也

怒則光芒枯燥

怒者光芒威色重大不潤刑罰暴急之象王冰曰光
色勃然臨芒刺滿溢其象凜然人見之畏星之怒也
疎折兮相離而疎就聚兮相近而數

疎折者相離失其常體散壞之象就聚者相近而聚
促迫之象也

大者大於本體吉星吉而凶星凶小者小於本體凶星吉而吉星惡

大者大於本體吉星則吉凶星則凶興建開拓之象
小者小於本體吉星則凶凶星則吉亡促迫之象岐
伯曰象之見高而遠則小下而近則大大則喜怒通
小則禍福遠王冰曰象見高而小既未卽禍亦未卽
福象見下而大福既不遠禍亦未遲但當修德省過
矣候厥終苟未能慎禍而求福佑豈有是理哉又曰
有德者天降福以應之有過者天降禍以淫之則知

禍福無門大小惟人自招耳

存者守常得正亡者失其本體

存者守常得正亡者失其所在也

未當去而去則爲出

一云離其宿分爲出出者未當去而去又曰高過其
座位離其宿分爲出福德之徵

不應來而來則爲入

一云同體共色爲入入者不應來而來又曰同形爲
入又曰若其常行初至其分間同體共色爲入妖禍

之徵

二星相遠則無傷七寸已內則災必

二星相近其殃大相遠無傷七寸已內必主災又曰
相近及七寸許或光芒相接皆爲犯犯與合相類相
犯爲殃小相合爲殃大侵犯之象

同舍同光爲合焉

合者二星相近同一處一宿之中又同舍或芒角相
及同光爲合和順則吉乖違合則凶

南北乖隔爲離失

離者雖同宿共度而南北乖隔一云相遠爲離徙二者雖同在宿分不相停待離徙不和之象

盈謂超舍太進

盈者超舍太進也過其所常德盈則吉刑盈則凶

縮謂退舍太遲

縮者退舍太遲不及其常刑縮之象

舍者經其宿而去緩

舍者經其宿度而行舍其宿而遲也

宿者經其宿而去疾

宿者經其舍而過徑去不留之謂

居乃在其宿位

居者福德之星在其宿位光色潤澤而遲降福之象
留乃住而不移

留者住而不移之稱祇異在宿謂悖亂之稱岐伯曰
以道久留逆守而下是謂省下王冰以道爲順行久
留謂應留之日數也逆守謂逆行而留省下謂省察
天下人君之有德有過也

東西相當則爲中

中者謂星行東西相當中停之象和則不然

在其中過則爲經

經者在其中過無所犯厯者次次相及而經歷過

經其中過又爲貫

貫者經其中過

光芒刺之爲刺名

刺者在旁過光芒刺之

磨謂切逼而過

磨者旁過而相切逼

靡雖逼而間生

靡者旁逼過而有間

鬪者往而復還

鬪者二體往返返而復合合而復離或相凌曰鬪

奄則謂二體合一察之不辨其形

同謂二體合一不辨其形也

環乃繞之而帀

環者星行繞之一周岐伯曰久留而環或離或附是謂益與其德也王冰曰環者如丸之繞盤迴而久去

也火議罪金議殺木土水則議德

繞乃環而不周

繞者環星不周

凌者如直凌去

凌者直而往也凌辱之象

句者往返如鉤

句者一往一返如鉤狀

巳謂往返又往再勾如巳之遊

巳者往而返返而又往再句如巳狀岐伯曰以道而

去去而速來曲而過之是謂肖遺過也王冰曰行已
去輒逆行而速來委曲而經過是謂遺其過而輒肖
察之也行緩住少住多蓋謂罪之有大有小按其遺
而斷之

曰牝曰牡在陽在陰

牝牡者左陽右陰也

兩體俱動而相觸曰觸

兩體俱動而直觸者謂之觸

自上而下若犯則曰乘

自上而下爲乘臨迫之象

一動一靜直相至則爲抵

與觸注同

以大迫小上迫下則爲侵

越禮而進以上迫下爲侵損害之意

兩體相着爲薄食之論

兩體相着曰食又云邊侵曰食亦爲襲

居之不去爲留守之稱

居之不去曰守一云相近曰守爲害之象五星客彗

字流星通用

遲者不及常度

遲者不及常度和緩之象

疾者行而過之

疾者過之迫急之象

逆而西行乃曰逆

逆者當東反西當西反東古者以西行爲逆暴逆之象

順而東行乃爲順

順者順其常度與厯數相應古者以東行爲順和順之象

相逢於一宿爲之會列

會者一逆一順一遲一疾相逢於一宿之中又光耀相逮爲會德會則福興刑會則禍起

自三星已上稱之聚期

聚者自三星已上爲聚集會之議福集則吉刑集則凶

從謂遲疾次第相及

從者遲速次第相及於一處從龍之象德先至則吉
刑先至則凶

月中見星星食月也

月中見星謂食月也

月掩星體星爲月食

月掩星而不見謂月食星

相近盛而明爲同光也可見

相近盛明爲同光

自下侵而食爲犯嚙也奚疑

自下侵而食之爲嚙凡五星與月爲變之法也

世無分土郡守乃古之諸侯

今之郡守乃古之諸侯

往制殊稱廷尉乃今之獄吏

今之執法典刑之臣卽古之廷尉也

鮮卑卽今爲北狄之種

今之北狄乃古之鮮卑

戎狄卽可兼酋帥之例

言戎狄者亦可兼於酋帥

文雖具於書術則在於意

天之文雖有成書術亦在人之責斷

凡欲致遠以鉤深可洞曉天文精義

鉤深致遠之道在乎詳明此天文精義然後可斷休咎也

天文精義賦卷五終